



Sesida dals

20 d'avust 2024

Communitgà ils

21 d'avust 2024

Protocol nr.

668/2024

### **Incumbensa Beeli**

concernent la surpigliada da la cuvrada finanziaria insufficienta en il sector d'ospital  
ambulant

### **Resposta da la Regenza**

La Lescha federala davart l'assicuranza da malsauns (LAMal; CS 832.10) regla en ils art. 43 ss. las tariffas ed ils pretschs. Tenor l'art. 43 al. 4 LAMal vegnan fixads ils pretschs e las tariffas en contracts tranter ils assicuraders ed ils furniturs da prestaziuns. Las tariffas ch'èn vegnidas fixadas tranter ils assicuraders ed ils furniturs da prestaziuns ston correspunder a l'economia da manaschi ed avair ina structura commensurada. Uschia vala il primat da tractativa per las tariffas da las prestaziuns che vegnan furnidas dals ospitals. Mo sch'ils ospitals ed ils assicuraders da malsauns n'arrivan betg da sa cunvegnir ad in contract tariffar, èsi chausa da la Regenza da fixar la tariffa.

La surpigliada da prestaziuns da basa fixas è ina part da las prestaziuns d'utilitad publica. En l'art. 24 al. 2 lit. a da la Lescha per promover la tgira da persunas malsaunas e l'assistenza da persunas attempadas e da persunas che basegnan tgira (Lescha per promover la tgira da persunas malsaunas, LTM; DG 506.000) na vegni betg fatg ina differenza tranter prestaziuns da basa fixas en il sector staziunar e talas en il sector ambulant. Cun pajar las prestaziuns d'utilitad publica vegnan pia indemnizadas tut las prestaziuns da basa fixas.

Il fatg ch'il chantun duai surpigliar la sutgaranzia che resulta da la differenza tranter la tariffa vertenta e la tariffa tenor l'economia da manaschi, cuntrafaschess per l'ina al primat da tractativa ch'è prescrit en la LAMal. Per l'autra na cuntegna il dretg chantunal nagina basa legala necessaria per conceder ina tala contribuziun.

La Regenza è actualmain vidlonder d'elavurar in project che pussibilitescha al chantun da garantir als ospitals – cun agid d'emprests – la liquiditad necessaria per il manaschi. En il rom d'ina procedura d'audiziun scursanida vegn il project suttamess vers la fin da l'onn als circuls pertutgads.

Per finir stoi vegnir renvià al fatg, ch'il Cussegl grond ha auzà considerablmain las contribuziuns als ospitals publics per il servetsch da transport en cas d'urgenza e d'ambulanza en il preventiv 2024. Per il preventiv 2025 vegn la Regenza a proponer al Cussegl grond d'augmentar essenzialmain il credit global per la cumpart dal chantun a las contribuziuns dal chantun e da las vischnancas als ospitals publics per prestaziuns d'utilitad publica ed a las contribuziuns per instrucziun e perscrutaziun, quai per pudair conceder contribuziuns pli autas als custs betg cuvrids che resultan als ospitals per furnir las prestaziuns da basa fixas. Uschia tegna ella er quint da la proposta da la Cumissiun per sanadad e fatgs socials concernent l'examinaziun da las contribuziuns dal chantun e da las vischnancas als ospitals publics per prestaziuns d'utilitad publica, ch'è vegnida acceptada dal Cussegl grond, sco er dal resultat dal rapport extern ch'è vegnì fatg silsunter da la Keller Unternehmensberatungs SA concernent l'examinaziun da las contribuziuns dal chantun e da las vischnancas als ospitals publics per las prestaziuns d'utilitad publica.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Dr. Jon Domenic Parolini

Il chancelier:

Daniel Spadin